



*Rabu, 28 Desember 2022*  
**Ogen : Ketangkasan 3:11**



**Jagalah Pemere Si I bas Kam**



**L**it singandingken maka waktu e bali ras sada anak panah si ndarat i bas busur nari, terus maju janah lanai banci mulihken. Bage me maka ikataken waktu e me sada kesempatan, entah uang (duit) si harus ipergunakan alu mehuli. Adi la ipergunakan lesap me.

Bas kitab Ketangkasan enda ipersingeti me perpulungan Piladelpia tetap setia ersembah man Dibata dinging ngikutken Kata Dibata. Sabap perpulungan e nggeluh i tengah-tengah kalak si ngikutken peraten daging (iblis), perguak dinging ngaku kalak erkiniteken tapi labo teridah i bas geluhna. Perintah gelah perpulungan tetap njagai kai si lit bas ia, ola bere kesempatan kalak sideban muatsa kai si enggo lit e. I bas perpulungan e enggo kuh kerna kekelengen bage pe si ngena ate Dibata, genduari tugas si endesken man bana banci tetap njagaisa sabap Iblis ersura-sura dinging rusaha terus guna mereken ngaruh dinging muat kai si lit bas ia e. Janji Tuhan man perpulungan enda maka IA pedas me reh. Tuhan ngidah kai si lit bas perpulungan e enggo mehuli, kekelengen e enggo lit bas ia e maka tetaplah pertahanken.

Moria si ikelengi Tuhan Jesus Kristus, melala kal si mehuli si enggo ibreken Dibata i bas geluhta. Setia kita i bas ngikuti perintah Dibata umpamana; nampati senina turang, nehken kekelengen, reh ku perpulungan ras sidebanna. Si enda kerina enggo mehuli, tetaplah si jaga segelah la mbewet-mbewet, la monce-once, janah si tambahi tole segelah reh sertana kita iadep-adepen Dibata. Ingetlah maka Tuhan e pedas me reh, pakeken teptep kesempatan alu mehuli bage pe njagai kai sienggo berekenNa.

*📖 Kerina pemere Dibata e mehuli kap, pakekenlah*